



Cardiff Students' Union  
Undeb Myfyrwyr Caerdydd

# Rheoliadau Etholiadau Senedd yr UM UMPC

*Sylwch: Mae ymgeiswyr wedi'u rhwymo'n swyddogol gan y rheoliadau hyn o'r eiliad y caiff yr hysbysiad pleidleisio sy'n cadarnhau'r rhestr o ymgeiswyr ei gyhoeddi ar wefan Undeb y Myfyrwyr. Er mwyn i enwebiadau ymgeiswyr gael eu cymeradwyo, rhaid iddynt sicrhau bod eu henwebiad yn cydymffurfio â'r canllawiau a nodir yn y rheoliadau hyn. Pan fydd y rheoliadau hyn yn cyfeirio at 'ymgeiswyr', maent hefyd yn cyfeirio at ymgyrchwyr/timau ymgyrchu.*

## Swyddi sydd ar Gael

Dyma'r swyddi sydd ar gael yn yr etholiad hwn:

- Swyddog Myfyrwyr Hŷn
- Swyddog Myfyrwyr sy'n Rhieni a Gofalwyr
- Senedd y Myfyrwyr
- Pwyllgor Gweithredol yr Undeb Athletau
- Pwyllgor Gweithredol y Gymraeg
- Pwyllgor Gweithredol Rhyngwladol
- Pwyllgor Gweithredol Ôl-raddedig
- Pwyllgor Gweithredol Cymdeithasau a Chymunedau
- Pwyllgor Gweithredol Llywydd yr UM
- Pwyllgor Gweithredol Israddedig

## Enwebiadau

Rhaid cyflwyno enwebiadau gan ddefnyddio'r ffurflen enwebu sydd ar gael ar yr Hysbysiad Etholiadau a chyn y dyddiad cau enwebiadau a gadarnhawyd yn yr Hysbysiad Etholiadau. Rhaid i unrhyw fyfyrwr sy'n cael problemau gyda'r broses enwebu roi gwybod am hyn cyn y dyddiad cau enwebiadau drwy e-bostio Tîm Etholiadau Undeb y Myfyrwyr ar [elections@cardiff.ac.uk](mailto:elections@cardiff.ac.uk). Ni ellir derbyn unrhyw enwebiadau ar ôl y dyddiad cau lle nad yw'r unigolyn wedi adrodd am y broblem o flaen llaw.

## Enw ar gyfer y bleidlais a hysbysiad o'r etholiad

Rhaid i ymgeiswyr ddarparu enw i ymddangos ar y bleidlais a'r hysbysiad pleidleisio wrth gyflwyno eu henwebiad. Dylai'r enw hwn fod naill ai eu henw cofrestredig ar gronfa ddata'r Brifysgol neu enw y maent yn ei ddefnyddio'n aml neu y cyfeirir atynt yn rheolaidd ag ef. Mae hyn er mwyn sicrhau bod myfyrwyr yn gwbl ymwybodol o'r ymgeiswyr y maent yn pleidleisio drostynt a phwy a allai gael eu hethol yn gynrychiolwyr iddynt.

Ni dderbynnir enwau nad ydynt yn cyd-fynd â'r diffiniad hwn a/neu sy'n cynnwys ymadroddion, enwau, neu eiriau sy'n gysylltiedig yn fwy cyffredin ag ymadroddion neu frandiau. Cyfrifoldeb yr ymgeiswyr yw sicrhau eu bod yn cyflwyno enwebiad o fewn y canllawiau a ddarperir, ac maent mewn perygl na chaiff eu



The heart of Cardiff student life  
Calon bywyd myfyrwyr Caerdydd

henwebiad ei dderbyn os na fyddant yn cydymffurfio â chyfarwyddiadau'r tîm etholiadau. Y dyddiad cau ar gyfer darparu enw priodol i ymddangos ar y bleidlais a'r hysbysiad pleidleisio yw'r un amser a dyddiad â'r dyddiad cau ar gyfer cyflwyno enwebiadau.

## Llun

Mae gan ymgeiswyr y dewis o ddarparu llun i ymddangos ar y bleidlais ar-lein gyda'u henwebiad(au). Nid oes rhaid i ymgeiswyr ddarparu llun. Rhaid i unrhyw lun sy'n cael ei ddarparu ddilyn y canllawiau.

Dylai'r llun fod yn gynrychiolaeth wirioneddol o'r ymgeisydd a chynnwys wyneb yr ymgeisydd. Ni ddylai unrhyw bobl eraill ymddangos o fewn ffocws y llun. Cyfrifoldeb yr ymgeiswyr yw sicrhau eu bod yn cyflwyno llun o fewn y canllawiau a ddarperir, fel arall, mae perygl na chaiff eu llun ei dderbyn os na fyddant yn cydymffurfio â chyfarwyddiadau'r tîm etholiadau.

## Cwestiynau Ymgeisydd

Ar gyfer yr etholiad hwn, gofynnir i bob ymgeisydd ateb dau gwestiwn. Nod y cwestiynau hyn yw helpu myfyrwyr i ddeall y math o gynrychiolydd myfyrwyr y byddai ymgeisydd pe bai'n cael ei ethol a pha flaenoriaethau y byddai ganddo. Nid oes gofyn i ymgeiswyr gyflwyno ateb ar hyn o bryd. Gall ymgeiswyr ddewis cyflwyno atebion ar ôl i'r enwebiadau gau drwy e-bost at [elections@cardiff.ac.uk](mailto:elections@cardiff.ac.uk) neu beidio â chyflwyno o gwbl. Mae gan ymgeiswyr uchafswm o 500 nod (tua 80 gair) ar gyfer pob cwestiwn. Dyma'r cwestiynau:

Q1. Pa brofiad neu sgiliau sydd gennych chi a fydd, yn eich barn chi, yn eich gwneud chi'n gynrychiolydd da?

Q2. Beth fyddai eich prif flaenoriaeth pe baech yn cael eich ethol?

Bydd eich atebion i'r cwestiynau hyn yn ymddangos ar y papur pleidleisio pan fydd myfyrwyr yn pleidleisio.

Dyma'r dyddiad cau ar gyfer cyflwyno cwestiynau ymgeisydd a dyddiadau allweddol eraill:

|                          | Dyddiad Cau                  | Proses Cyflwyno                                                                                                                                 |
|--------------------------|------------------------------|-------------------------------------------------------------------------------------------------------------------------------------------------|
| <b>Cyflwyno Enwebiad</b> | Dydd Iau 22ain Hydref, 6yh   | Wedi'i gyflwyno drwy'r <a href="#">ffurflen enwebu</a> .                                                                                        |
| <b>Cyflwyno Llun</b>     | Dydd Llun 26ain Hydref, 10yb | Wedi'i gyflwyno drwy'r <a href="#">ffurflen enwebu</a> neu drwy e-bost i <a href="mailto:Elections@cardiff.ac.uk">Elections@cardiff.ac.uk</a> . |



**The heart of Cardiff student life**  
**Calon bywyd myfyrwyr Caerdydd**

|                             |                                |                                                                                                                                                 |
|-----------------------------|--------------------------------|-------------------------------------------------------------------------------------------------------------------------------------------------|
| <b>Cwestiynau Ymgeisydd</b> | Dydd Llun 26ain Hydref, 10yb   | Wedi'i gyflwyno drwy'r <a href="#">ffurflen enwebu</a> neu drwy e-bost i <a href="mailto:Elections@cardiff.ac.uk">Elections@cardiff.ac.uk</a> . |
| <b>Deunyddiau Print</b>     | Dydd Mawrth 27ain Hydref, 10yb | Wedi'i gyflwyno drwy e-bost i <a href="mailto:Elections@cardiff.ac.uk">Elections@cardiff.ac.uk</a> .                                            |

### Meini Prawf Cymhwysedd

I fod yn gymwys i sefyll yn yr etholiad hwn rhaid i chi yn fyfyrwr ym Mhrifysgol Caerdydd ar ddiwedd y cyfnod enwebu.

Mae yna hefyd feini prawf cymhwysedd ychwanegol ar gyfer rhai rolau yn yr etholiad hwn fel y rhestrir isod. Lle nad yw swydd wedi'i rhestru isod nid oes unrhyw ofynion cymhwysedd ychwanegol.

Mewn rhai achosion, mae'r gofynion ychwanegol hyn yn cael ei ddiffinio gan yr ymgeisydd ei hun, tra bydd eraill yn cael eu gwirio gan Dîm Etholiadau Undeb y Myfyrwyr wrth gadarnhau eich statws myfyriwr a'ch cymhwysedd i sefyll.

| <b>Swydd</b>                            | <b>Gofynion Cymhwysedd Ychwanegol</b>                                                                                                | <b>Proses Wirio</b>                          |
|-----------------------------------------|--------------------------------------------------------------------------------------------------------------------------------------|----------------------------------------------|
| Swyddog Myfyrwyr Hŷn                    | Myfyrwyr a oedd naill ai'n 21 oed neu'n hŷn ar ddechrau eu gradd Israddedig neu'n 25 oed neu'n hŷn ar ddechrau eu gradd Ôl-raddedig. | Cael ei wirio drwy'r Cofnodion/Data Myfyrwyr |
| Swyddog Myfyrwyr sy'n Rhieni a Gofalwyr | Myfyriwr sydd â chyfrifoldebau rhiant neu ofalu.                                                                                     | Cael ei ddiffinio gan yr ymgeisydd ei hun    |
| Pwyllgor Gweithredol yr Undeb Athletau  | Myfyrwyr sy'n aelodau o'r Undeb Athletau a/neu'n aelod o dîm chwaraeon sy'n gysylltiedig â'r brifysgol fel IMG.                      | Cael ei wirio drwy MSL neu Brawf Aelodaeth   |
| Pwyllgor Gweithredol y Gymraeg          | Myfyrwyr sy'n siaradwyr neu'n ddysgwyr Cymraeg.                                                                                      | Cael ei ddiffinio gan yr ymgeisydd ei hun    |



**The heart of Cardiff student life**  
Calon bywyd myfyrwyr Caerdydd

|                                  |                                                                                                                                                                   |                                              |
|----------------------------------|-------------------------------------------------------------------------------------------------------------------------------------------------------------------|----------------------------------------------|
| Pwyllgor Gweithredol Rhyngwladol | Myfyrwyr rhyngwladol sy'n talu ffioedd a/neu fyfyrwr sydd wedi byw neu wedi astudio dramor am gyfnod o dair blynedd o leiaf.                                      | Cael ei ddiffinio gan yr ymgeisydd ei hun    |
| Pwyllgor Gweithredol Ôl-raddedig | Myfyrwyr sydd wedi astudio neu sydd wrthi'n astudio am radd ôl-raddedig (a addysgir neu ymchwil) ym Mhrifysgol Caerdydd. Nid yw hyn yn cynnwys Meistr Integredig. | Cael ei wirio drwy'r Cofnodion/Data Myfyrwyr |
| Pwyllgor Gweithredol Israddedig  | Myfyrwyr sydd â gradd israddedig o Brifysgol Caerdydd neu sy'n astudio am radd o'r fath ar hyn o bryd.                                                            | Cael ei wirio drwy'r Cofnodion/Data Myfyrwyr |

## Polisi Addas i Sefyll

Wrth gyflwyno eu henwebiadau gofynnir i ymgeiswyr gadarnhau eu bod yn 'addas i sefyll' ac nad ydynt yn gwybod am unrhyw reswm pam na ddylent fod yn gymwys yn seiliedig ar ofynion Addas i Sefyll Undeb y Myfyrwyr.

Mae gofynion Addas i Sefyll Undeb y Myfyrwyr yn bodoli i amddiffyn myfyrwyr rhag y niwed parhaus neu bosibl a allai gael ei achosi gan ymgeisydd sydd naill ai dan ymchwiliad neu y mae cwynion wedi'u cadarnhau yn ei erbyn mewn materion sy'n ymwneud ag aflonyddu, ymosodiad a thrais rhywiol.

Wrth gyflwyno eu henwebiad gofynnir i ymgeiswyr gadarnhau a chytuno â'r datganiad canlynol:

"Rwy'n cadarnhau, hyd y gwn i, nad wyf ar hyn o bryd dan ymchwiliad gan y Brifysgol (gan gynnwys unrhyw adran, rhaglen, ysgol, coleg na thîm y Brifysgol), Undeb y Myfyrwyr na'r Heddlu, ac nid oes cwynion wedi'u cadarnhau yn fy erbyn gan y Brifysgol, Undeb y Myfyrwyr na'r Heddlu mewn perthynas â'r materion canlynol:

- Camymddwyn Rhywiol
- Ymddygiad Rhywiol Amhriodol (a all gynnwys, ond heb fod yn gyfyngedig i drais, meithrin perthynas amhriodol, camymddwyn ac aflonyddu)
- Cam-drin Perthynas a Pherthnasoedd Afiach
- Treisio
- Ymosodiad Rhywiol



**The heart of Cardiff student life**  
Calon bywyd myfyrwyr Caerdydd

- Trais Rhywiol
- Trais
- Cam-drin
- Aflonyddu
- Bwlio
- Troseddau Casineb
- Trais Corfforol
- Gwahaniaethu”

Ni fydd ymgeiswyr sy'n methu a chadarnhau'r datganiad uchod yn gymwys i sefyll yn yr etholiad hwn. Gofynnir i ymgeiswyr gytuno i'r gofyniad canlynol ar gyfer eu henwebiad hefyd.

“Rwy'n cytuno bod gan Dîm Etholiadau Undeb y Myfyrwyr yr hawl i wirio fy nghymhwysedd i sefyll yn yr etholiad hwn gyda'r Brifysgol a'i hadrannau perthnasol. Mae hyn yn cynnwys gwybodaeth mewn perthynas â'm statws myfyriwr, fy nghydymffurfiaeth â Gofynion Addas i Sefyll Undeb y Myfyrwyr ac unrhyw feini prawf cymhwysedd eraill ar gyfer y rôl yr wyf wedi fy enwebu fy hun ar ei chyfer. Felly, rwyf hefyd yn rhoi'r hawl i'r Brifysgol gadarnhau gyda Thîm Etholiadau Undeb y Myfyrwyr a ydw i'n gymwys ai peidio i sefyll yn yr etholiad hwn ac ar gyfer y swydd a gyflwynwyd gennyf yn unol â'r gofynion a'r meini prawf a nodir.”

Ni fydd ymgeiswyr nad ydynt yn cytuno i Undeb y Myfyrwyr wirio eu cymhwysedd i sefyll yn yr etholiad yn gymwys i sefyll yn yr etholiad hwn.

Os, ar ôl cadarnhau'r datganiadau hyn, bydd sefyllfa ymgeisydd yn newid (h.y. cael ei hysbysu am ymchwiliad wedyn), cyfrifoldeb yr ymgeisydd yw hysbysu Tîm Etholiadau Undeb y Myfyrwyr cyn gynted â phosibl.

Ar ddiwedd y cyfnod enwebu, bydd Tîm Etholiadau Undeb y Myfyrwyr yn cynnal gwiriad cymhwysedd ar bob ymgeisydd gan gynnwys cyfathrebu â'r Brifysgol gyda rhestr o'r myfyrwyr sydd wedi enwebu eu hunain. Ar y pwynt hwn, gall y Brifysgol hysbysu Undeb y Myfyrwyr am ymgeiswyr nad ydynt yn gymwys i sefyll o ran statws myfyriwr, meini prawf cymhwysedd y rôl, neu'r gofynion Addas i Sefyll. O ran y gofynion Addas i Sefyll, ni fydd y Brifysgol yn darparu unrhyw wybodaeth ychwanegol i Dîm Etholiadau Undeb y Myfyrwyr heblaw am y ffaith nad yw'r ymgeisydd yn gymwys. Yna bydd Tîm Etholiadau Undeb y Myfyrwyr yn hysbysu'r ymgeisydd and yw'n gymwys ac ni fydd unrhyw lwybr apelio yn erbyn y penderfyniad hwn ar gael.

Dim ond achosion lle mae cwynion/ymchwiliadau wedi'u cychwyn yn erbyn myfyriwr cyn i'r enwebiadau gau y mae'r polisi Addas i Sefyll yn eu cwmparu. Os codir cwynion sy'n ymwneud â'r materion a restrir yn y polisi Addas i Sefyll ar ôl i'r enwebiadau gau ac unwaith y bydd y rhestr o ymgeiswyr wedi'i chyhoeddi, yna bydd safle ymgeisydd yn yr etholiad yn aros yr un fath hyd nes y bydd yr ymchwiliad hwnnw wedi'i gwblhau, oni bai bod y corff sy'n cynnal yr ymchwiliad yn ei ystyried bod angen gweithredu fel arall.

Pan fydd ymchwiliad wedi'i gwblhau a chwyn yn wedi'i ei chadarnhau yn erbyn ymgeisydd, mewn perthynas ag unrhyw un o'r materion a restrir yn y gofynion Addas i Sefyll, cyn cyhoeddi'r canlyniadau, caiff yr ymgeisydd dan sylw ei dynnu o'r etholiad.



**The heart of Cardiff student life**  
**Calon bywyd myfyrwyr Caerdydd**

Pan fydd ymchwiliad wedi'i gwblhau a chwyn wedi'i chadarnhau yn erbyn ymgeisydd, mewn perthynas ag unrhyw un o'r materion a restrir yn y gofynion Addas i Sefyll, cyn i ymgeisydd llwyddiannus ymgymryd â'i rôl, yna ni fydd yr unigolyn yn gymwys i ymgymryd â'i swydd a byddai'r cyfrif ar gyfer yr etholiad y safodd ynddo yn cael ei ail-gynnal.

Ni fydd Tîm Etholiadau Undeb y Myfyrwyr yn ymchwilio i gwynion sy'n ymwneud â'r materion a restrir yn y gofynion Addas i Sefyll. Fodd bynnag, byddant yn gweithredu yn unol â'r penderfyniadau a wneir gan y rhai sydd â'r cyfrifoldeb dros ymchwilio i'r cwynion perthnasol ac i bennu eu canlyniadau. Ar ben hynny, nid yw'r polisi hwn yn cwmpasu'r camau a fyddai'n cael eu cymryd yn erbyn swyddog presennol ar ôl iddynt ddechrau eu tymor yn y swydd gan nad yw'r unigolyn bellach wedi'i ddal gan reoliadau'r etholiad.

Os canfyddir ar unrhyw adeg fod ymgeisydd neu unigolyn a etholwyd yn llwyddiannus wedi dweud celwydd neu wedi camarwain Tîm Etholiadau Undeb y Myfyrwyr mewn perthynas â'u cymhwysedd i sefyll, gellir eu gwahardd o'r etholiad neu eu tynnu o'u swydd.

### **Ymgyrchu ac Ymddygiad**

Mae etholiadau Undeb Myfyrwyr Prifysgol Caerdydd yn cael eu llywodraethu gan 4 egwyddor graidd sy'n rheoleiddio ymgyrchu ac ymddygiad ymgeiswyr. Rydym am i chi fel ymgeiswyr fod yn rhydd i ymgyrchu mewn ffyrdd clyfar a chreadigol heb orfod poeni am gofio rhestrau hir o reolau. Yn hytrach, dylai'r 4 egwyddor arwain penderfyniadau ymgeiswyr ynghylch eu hymgyrch.

Wedi dweud hynny, os bydd ymgeiswyr yn gweithredu'n groes i ysbryd yr egwyddorion maent yn destun sancsiynau gan y tîm etholiadau. Gall y rhain amrywio o gyfyngu ar wahanol fathau o gyhoeddusrwydd i, mewn achosion eithafol, gael eu tynnu o'r etholiad.

### **Yr Egwyddorion**

- 1) Rhaid i fyfyrwyr fod yn rhydd i bleidleisio heb ddylanwad na phwysau gormodol
- 2) Rhaid i ymgeiswyr gydymffurfio â'r gyfraith, â pholisïau'r Undeb a'r brifysgol.
- 3) Dylai ymgeiswyr ganolbwyntio ar eu hymgyrch eu hunain ac felly osgoi ymyrryd ag ymgyrchu ymgeiswyr eraill.
- 4) Rhaid cyfrif am eitemau a gynhyrchir neu a ddefnyddir yn bennaf ar gyfer ymgyrch ymgeisydd o fewn y lwfans a roddir yn unol â rheoliadau etholiadol ariannol yr Undeb.

### **Sut mae'n gweithio**

I roi syniad i chi o sut mae hyn yn gweithio, dyma rai enghreifftiau o sut caiff yr egwyddorion eu cymhwyso isod:

- 1) Rhaid i fyfyrwyr fod yn rhydd i bleidleisio heb ddylanwad na phwysau gormodol

Ni chaiff ymgeiswyr sefyll a gwylio myfyrwyr tra byddant yn pleidleisio, gan y byddai hynny'n rhoi pwysau ar y myfyriwr i bleidleisio dros yr ymgeisydd hwnnw. Dylai ymgeiswyr sicrhau eu bod yn camu i ffwrdd



**The heart of Cardiff student life**  
**Calon bywyd myfyrwyr Caerdydd**



oddi wrth fyfyrwr unwaith y bydd y broses bleidleisio wedi dechrau. Er y caniateir dosbarthu taflen a losin er mwyn helpu myfyrwyr i'ch cofio ac i wrando amoch, ni chaniateir cynnig gwobr i fyfyrwyr (boed losin neu rywbeth arall) y byddent yn ei derbyn ar ôl pleidleisio drosoch, gan y byddai hyn yn cael ei ystyried yn ddylanwad gormodol.

- 2) Rhaid i ymgeiswyr gydymffurfio â'r gyfraith, â pholisïau'r Undeb a'r brifysgol.

Mae hyn yn golygu bod yn rhaid i chi fel ymgeisydd a'ch tîm ymgyrchu, fel bob amser, gydymffurfio â'r gyfraith, rheoliadau'r Brifysgol (megis eu cod ymddygiad, rheoliadau iechyd a diogelwch, gweithdrefnau cyfle cyfartal, cod aflonyddu, difrod i eiddo'r brifysgol, a defnydd o e-bost ac ati) a pholisïau'r Undeb (megis ein polisi Dim Goddefgarwch, Rheoliadau Etholiadau ac ati). Gall torri'r polisïau hyn arwain at gamau disgyblu a allai yn ei dro effeithio ar eich statws fel myfyrwr a'ch aelodaeth o'r Undeb, yn ogystal ag effeithio ar eich statws fel ymgeisydd mewn etholiad.

- 3) Dylai ymgeiswyr ganolbwyntio ar eu hymgyrch eu hunain ac felly osgoi ymyrryd ag ymgyrchu ymgeiswyr eraill.

Mae hyn yn golygu bod disgwyl i ymgeiswyr ganolbwyntio ar eu hymgyrch eu hunain a pheidio â gwneud unrhyw beth a fyddai'n ymyrryd ag ymgyrchu ymgeiswyr eraill. Er enghraifft: mae difwyno deunyddiau cyhoeddusrwydd ymgeiswyr eraill a gwatwar ymgeiswyr eraill ymhlith y gweithredoedd a fyddai'n cael eu hystyried fel torri'r egwyddor hon. Fodd bynnag, mae ymgeiswyr yn dal i fod yn rhydd i drafod rhinweddau manifestu neu safle ymgeisydd arall ac ni fyddai trafodaeth o'r fath yn cael ei hystyried fel torri'r egwyddor hon.

- 4) Rhaid cyfrif am eitemau a gynhyrchir neu a ddefnyddir yn bennaf ar gyfer ymgyrch ymgeisydd o fewn y lwfans a roddir yn unol â rheoliadau etholiadol ariannol yr Undeb (gweler isod).

## Rheoliadau Ariannol Etholiad

### Ymgeiswyr Swyddog Ymgyrchu

Mae gan ymgeiswyr sy'n sefyll am swydd Swyddog Ymgyrchu yn yr etholiad hwn lwfans o £20. Mae'r rheoliadau canlynol yn berthnasol i ymgeiswyr Swyddog Ymgyrchu yn unig.

- 1) Mae'r lwfans hwn i'w wario ar gostau sy'n gysylltiedig â'ch ymgyrch. Ni allwch wario mwy na'r swm hwn ar eich gweithgaredd ac adnoddau ymgyrchu.
- 2) Er mwyn hyrwyddo dulliau cynaliadwy o ymgyrchu, **ni chaiff** ymgeiswyr argraffu eu deunyddiau print eu hunain gan gynnwys posteri, taflenni, pamffledi a chardiau busnes. Bydd Undeb y Myfyrwyr yn darparu nifer penodol o gopïau print o'u posteri o wahanol feintiau i bob ymgeisydd. Bydd y rhain yn cael eu graddio i fyny ac i lawr o fersiwn A4 (portread) y bydd ymgeiswyr yn ei ddarparu fel eu manifestu poster. Bydd manylion union y niferoedd a'r meintiau ar gael i ymgeiswyr ar ôl i'r enwebiadau gau.



**The heart of Cardiff student life**  
**Calon bywyd myfyrwyr Caerdydd**

- 3) Mae'n ofynnol i bob ymgeisydd gyflwyno derbynebau ar gyfer **holl variant** yr ymgyrch cyn cyfarfod terfynol yr ymgeiswyr ynghyd â ffurflen dreuliau.
- 4) Lle nad yw'n bosibl cael derbynneb ar gyfer eitem, rhaid i ymgeiswyr gytuno ar werth y farchnad gyda'r tîm etholiadau **cyn** ei defnyddio. Bydd y swm hwn wedyn yn cael ei gyfrif tuag at gyfanswm gwariant yr etholiad.
- 5) Gellir defnyddio gwariant ymgyrch ar unrhyw beth a restrir isod.
- 6) Os ydych yn ansicr a ddylid cyfrif eitem fel gwariant ai peidio, cyfrifoldeb yr ymgeisydd yw cael eglurder gan y tîm etholiadau cyn defnyddio unrhyw ddeunyddiau. Dylid cael yr eglurder hwn yn ysgrifenedig drwy e-bost ([Elections@cardiff.ac.uk](mailto:Elections@cardiff.ac.uk)).
- 7) Ni all ymgeiswyr rannu costau cynhyrchu a defnyddio asedau yn eu hymgyrch. Lle bynnag y defnyddiwyd eitem i gefnogi ymgyrch ymgeisydd, bydd yr ymgeisydd unigol yn atebol i ddiynnu'r swm llawn o'u gwariant waeth beth fo gyfanswm nifer yr ymgeiswyr sy'n elwa. h.y. mae'n ofynnol i grŵp o ymgeiswyr sy'n ymgyrchu gyda'i gilydd ac yn hyrwyddo ei gilydd gyfrif yn unigol am werth llawn unrhyw adnoddau a ddefnyddir yn eu hymgyrch.

Gellir cyfrif yr eitemau canlynol fel gwariant ymgeiswyr.

- Paent, peniau, a deunyddiau crefft
- Hen gardbord, cynfasau, ffabrig neu ddeunyddiau tebyg
- Tâp selotep, pinnau, tac glas, glud, llinyn neu ddeunyddiau gosod eraill
- Costau car a chludiant
- Gwisgoed
- Dillad
- Bandiau arddwrn
- Laniards
- Bagiau Tote
- Gwasanaethau dylunio graffeg, fideo neu ffotograffiaeth
- Meddalwedd creu cynnwys digidol a brynwyd yn benodol ar gyfer ymgyrchu
- Llogi offer
- Gemau neu weithgareddau a ddefnyddir i ymgysylltu â phleidleiswyr
- Losin, siocledi, lluniaeth di-alcohol neu eitemau traul gwerth isel eraill a ddosberthir yn ystod ymgyrchu
- Unrhyw eitem arall a gymeradwywyd gan y Tîm Etholiadau fel gwariant sy'n gysylltiedig ag ymgyrchu

Pob Ymgeisydd Arall



**The heart of Cardiff student life**  
**Calon bywyd myfyrwyr Caerdydd**



Mae gan ymgeiswyr sy'n sefyll am unrhyw swydd arall yn yr etholiad hwn lwfans o £0. Mae'r rheoliadau canlynol yn berthnasol i ymgeiswyr Senedd y Myfyrwyr a'r Pwyllgorau Gweithredol yn unig.

- 1) Os canfyddir bod ymgeisydd nad oes ganddo hawl i wariant wedi gwario arian ar ei ymgyrch, mae mewn perygl o gael ei dynnu o'r etholiad
- 2) Bydd Undeb y Myfyrwyr yn darparu nifer penodol o gopïau print o'u posteri i bob ymgeisydd, yn amrywio o ran maint. Bydd y rhain yn cael eu graddio i fyny ac i lawr o fersiwn A4 (portread) y bydd ymgeiswyr yn ei ddarparu fel eu manifest poster. Bydd union fanylion y niferoedd a'r meintiau ar gael i ymgeiswyr ar ôl i'r enwebiadau gau.

### **Torri Cod Ymddygiad**

Ar ôl cael adroddiad am achos o dorri'r rheolau ymddygiad, bydd ymgeiswyr yn cael eu hadrodd i'r tîm etholiadau a fydd yn cynnal ymchwiliad ac yn rhoi sancsiynau os canfyddir bod yr ymgeisydd wedi torri'r rheolau. Mae gan y Swyddog Canlyniadau neu'r Dirprwy Swyddog Canlyniadau'r hawl i roi sancsiynau a hyd yn oed dynnu ymgeisydd o'r broses etholiad os ydynt yn teimlo bod hynny'n briodol.

### **Canllawiau Ychwanegol**

O bryd i'w gilydd, gall y tîm etholiadau, gan gynnwys y Swyddog Canlyniadau neu'r Dirprwy Swyddog Canlyniadau, gyhoeddi canllawiau etholiad pellach. Gall y canllawiau hyn gwmpasu unrhyw elfennau o gynnal etholiad a dylid eu dilyn yn yr un modd â'r rheoliadau hyn. Bydd unrhyw ganllawiau o'r fath yn cael eu rhannu gydag ymgeiswyr drwy e-bost.

### **Sut i Wneud Cwyn**

Rhaid derbyn pob cwyn o fewn 24 awr i'r digwyddiad ddigwydd a rhaid iddi gyrraedd Tîm Etholiadau Undeb y Myfyrwyr yn ysgrifenedig cyn i'r bleidlais gau.

Mae modd gwneud cwynion drwy e-bostio [Elections@cardiff.ac.uk](mailto:Elections@cardiff.ac.uk) a rhaid cynnwys y wybodaeth ganlynol;

- Manylion y digwyddiad (pryd a ble y digwyddodd ac a oedd unrhyw dystion)
- Tystiolaeth
- Pa reoliad sydd wedi'i dorri
- Beth rydych chi'n disgwyl i ni ei wneud


Bydd y Swyddog Canlyniadau yn adolygu ac yn dyfarnu ar bob cwyn cyn dechrau'r cyfrif.

### **Asesu Cwynion**

Mae'r tîm etholiadau yn asesu pob cwyn yn unigol yn erbyn fframwaith sydd wedi'i safoni i ryw raddau. Drwy ofyn cyfres o gwestiynau mae'r tîm etholiadau yn sicrhau bod pob ymgeisydd yn cael ei drin yn gyfartal.



**The heart of Cardiff student life**  
**Calon bywyd myfyrwyr Caerdydd**



## Hygyrchedd

Nod y tîm etholiadau yw gwneud y broses etholiadau mor hygyrch â phosibl. Os oes gennych unrhyw anghenion hygyrchedd yr hoffech chi roi gwybod i'r tîm etholiadau amdanynt, neu a fyddai'n gofyn am roi eithriadau ar waith, anfonwch e-bost at y tîm etholiadau ar [elections@cardiff.ac.uk](mailto:elections@cardiff.ac.uk) cyn gynted â phosibl.

## Dyddiadau Pwysig

| Digwyddiadau Allweddol           | Dyddiad                        |
|----------------------------------|--------------------------------|
| Enwebiadau'n Agor                | Dydd Llun 14eg Medi, 10yb      |
| Enwebiadau'n Cau                 | Dydd Iau 22ain Hydref, 6yh     |
| Dyddiad Cau Llun Ymgeisydd       | Dydd Llun 26ain Hydref, 10yb   |
| Dyddiad Cau Cwestiynau Ymgeisydd | Dydd Llun 26ain Hydref, 10yb   |
| Deunyddiau Print                 | Dydd Mawrth 27ain Hydref, 10yb |



**The heart of Cardiff student life**  
Calon bywyd myfyrwyr Caerdydd

|                    |                              |
|--------------------|------------------------------|
| Pleidleisio'n Agor | Dydd Llun 2il Tachwedd, 10yb |
| Pleidleisio'n Cau  | Dydd Iau 5ed Tachwedd, 6yh   |
| Canlyniadau        | Dydd Gwener 6ed Tachwedd     |

### **Cadarnhau Dealltwriaeth o Reoliadau'r Etholiad**

Mae'n ofynnol i ymgeiswyr gadarnhau eu bod wedi darllen a deall Rheoliadau'r Etholiad yn llawn ac wedi ymgysylltu yn y sesiwn briffio ymgeiswyr gorfodol. Bydd ymgeiswyr sy'n methu â chadarnhau hyn yn cael eu tynnu o'r etholiad yn awtomatig

### **Cod Ymddygiad**

Os cânt eu hethol yn llwyddiannus, mae'n ofynnol i ymgeiswyr gydymffurfio â'r cod ymddygiad ar gyfer y rôl(au) y byddant yn eu cyflawni.



**The heart of Cardiff student life**  
**Calon bywyd myfyrwyr Caerdydd**